

სამახსოვრო ინსტრუქცია

განკუთვნილია საუბნო საარჩევნო კომისიის თავმჯდომარისთვის

მოიცავს ასევე კენჭისყრის დღეს საუბნო საარჩევნო კომისიის მდივნის მიერ განსახორციელებელი საქმიანობის ასპექტებს

ქალაქ ბათუმის მუნიციპალიტეტის
წარმომადგენლობითი ორგანოს – საკრებულოს
2022 წლის 2 აპრილის შუალედური
არჩევნებისათვის ზოგიერთი საარჩევნო
პროცედურის ელექტრონული საშუალებებით
განსახორციელებლად

საუბნო საარჩევნო კომისიის/კომისიის თავმჯდომარის/კომისიის მდივნის უფლებამოსილებებისა და საქმიანობის წესთან დაკავშირებული საკანონმდებლო რეგულაციების სრული სახით გაცნობის მიზნით, იხილეთ საქართველოს ორგანული კანონი „საქართველოს საარჩევნო კოდექსი“, ცესკოს 2022 წლის 1 მარტის №22/2022 დადგენილება „ქ. ბათუმის მუნიციპალიტეტის წარმომადგენლობითი ორგანოს – საკრებულოს 2022 წლის 2 აპრილის შუალედური არჩევნებისათვის ზოგიერთი საარჩევნო პროცედურის ელექტრონული საშუალებებით განსახორციელებლად საუბნო საარჩევნო კომისიის წევრთა სახელმძღვანელო ინსტრუქციის დამტკიცების თაობაზე“ და ცესკოს შესაბამისი სამართლებრივი აქტები.

საუბნო საარჩევნო კომისიის თავმჯდომარის უფლებამოსილებანი

1. საუბნო საარჩევნო კომისიის სხდომასთან დაკავშირებული უფლებამოსილებანი:

- იწვევთ საუბნო საარჩევნო კომისიის სხდომას;
- უძღვებით საუბნო საარჩევნო კომისიის სხდომას.

2. ადმინისტრაციული ფუნქციები:

- უფლება გაქვთ, დავალება მისცეთ კომისიის თავმჯდომარის მოადგილეს, კომისიის მდივანს და კომისიის სხვა წევრებს;
- უფლება გაქვთ, კომპეტენციის ფარგლებში გამოსცეთ განკარგულება;
- იღებთ და თქვენი რეზოლუციით ანაწილებთ საუბნო საარჩევნო კომისიაში შემოსულ საარჩევნო საბუთებს და საუბნო საარჩევნო კომისიის სახელზე შემოსულ კორესპონდენციას;
- პასუხისმგებელი ხართ საოლქო საარჩევნო კომისიისგან საარჩევნო დოკუმენტაციის, ინვენტარის და სხვა მასალების მიღებისთვის, შენახვისა და დანიშნულებისამებრ გაცემისთვის.
- საჯაროობის უზრუნველსაყოფად გაითვალისწინეთ, რომ საარჩევნო უბანზე თვალსაჩინო ადგილას გამოკრული უნდა იყოს:
 - ☐ კომისიის საკონტაქტო ტელეფონის ნომრები და სხვა რეკვიზიტები;
 - ☐ საარჩევნო ადმინისტრაციის ის სამართლებრივი აქტები, რომლებიც შეეხება საუბნო საარჩევნო კომისიის საქმიანობას;
 - ☐ საუბნო საარჩევნო კომისიისა და კომისიის თავმჯდომარის განკარგულებები;
 - ☐ ამომრჩეველთა ერთიანი სიის საჯარო ინფორმაციისთვის მიკუთვნებული ვერსია (კედლის სია ფოტოსურათების გარეშე), ამომრჩეველთა სიებში ცვლილებების შეტანის და უზუსტობების გასაჩივრების წესი და ვადები.

ყურადღება!

კენჭისყრის დღემდე არაუგვიანეს მეორე დღისა გადმოგეცემათ დაზუსტებული სიების საბოლოო ვერსია - საჯარო ინფორმაციისთვის მიკუთვნებული ვერსია – კედლის სია.

საჯარო ინფორმაციისთვის მიკუთვნებული კედლის სიის თავდაპირველი ვერსია უნდა ჩამოხსნათ და იმავე ადგილას დაზუსტებული ვერსია გამოაკრათ.

1. ახალი კორონავირუსით (SARS-CoV-2) გამოწვეული ინფექციის (COVID-19) გავრცელების პრევენციის მიზნით, კენჭისყრის შენობაში გასატარებელი სანიტარიულ-ჰიგიენური ღონისძიებები:

- საარჩევნო უბნის გახსნამდე და კენჭისყრის შედეგების შეჯამების პროცესის დასრულების შემდგომ უნდა მოხდეს კენჭისყრის შენობის დალაგება და დამუშავება სადეზინფექციო ხსნარით;
- კენჭისყრის დღის განმავლობაში უზრუნველყოფილი უნდა იყოს კენჭისყრის შენობაში ხშირად შეხებადი ზედაპირების (მათ შორის კარის სახელოები, სამუშაო მაგიდების და ა.შ.) სათანადო წესით წმენდა/დეზინფექცია ყოველ 3 საათში ერთხელ და დაბინძურების შესაბამისად. ამ მიზნებისთვის კენჭისყრის დღეს კენჭისყრის შენობა უზრუნველყოფილი უნდა იყოს დამლაგებლით, რომელიც უნდა იქნეს აღჭურვილი ინდივიდუალური დაცვის საშუალებებით: ერთჯერადი სამედიცინო ნიღაბი, სპეციალური/სქელი ხელთათმანები (მრავალჯერადი), სახის დამცავი ფარი;
- კენჭისყრის დღისთვის კენჭისყრის შენობაში უნდა განთავსდეს კენჭისყრის შენობაში ყოფნის უფლების მქონე

ყველა პირის მიერ გამოყენებული ერთჯერადი ხელსაწყოების, თუ სხვა გამოყენებული ჰიგიენური ნარჩენებისთვის დახურული კონტეინერი, რომელშიც ჩაფენილი იქნება ერთჯერადი პლასტიკური პაკეტი. ნარჩენების პარკის ამოღება და განკარგვა უნდა მოხდეს ერთჯერადი ხელთათმანების გამოყენებით, ხოლო ასეთი ნარჩენების დროული გატანა უზრუნველყოფილი უნდა იყოს დამლაგებლის მიერ;

- კენჭისყრის დღეს, პერიოდულად, დღეში რამდენჯერმე, უნდა მოხდეს კენჭისყრის შენობის ბუნებრივი ვენტილაცია.

საუბნო საარჩევნო კომისიის თავმჯდომარის უფლებამოსილებანი კენჭისყრის წინა დღეს (1 აპრილი)

1. კენჭისყრის შენობის მოწყობასთან დაკავშირებული უფლებამოსილებანი:

- პასუხისმგებლობა გეკისრებათ კენჭისყრის შენობის მოწყობისთვის. გაითვალისწინეთ:
 - ახალი კორონავირუსით გამოწვეული ინფექციის გავრცელების პრევენციის მიზნით, კენჭისყრის შენობის შესასვლელთან უნდა განთავსდეს დეზობარიერი (კოლექტიური დაცვის საშუალება) და ხელის დეზინფექციისთვის საჭირო სულ მცირე 70% ალკოჰოლის შემცველი ხელის დასამუშავებელი ხსნარი (კენჭისყრის შენობაში შესვლისას და შენობის დატოვებისას ხელის დეზინფექციის მიზნებისთვის).
 - უნდა გამოიყოს ადგილები ამომრჩეველთა რეგისტრაციისათვის და განთავსდეს მაგიდები რეგისტრატორთა რაოდენობის შესაბამისად.
 - კენჭისყრის შენობაში ყოველი 500 ამომრჩევლისთვის უნდა მოეწყოს არანაკლებ ერთი კენჭისყრის კაბინა, სადაც უნდა იყოს საარჩევნო ბიულეტენის შესავსები სპეციალური მარკერი (საჭიროების შემთხვევაში გათვალისწინებულ უნდა იქნას შპმ ამომრჩევლებისთვის ადაპტირებული კენჭისყრის კაბინა).

გაითვალისწინეთ!

ახალი კორონავირუსით გამოწვეული ინფექციის გავრცელების პრევენციის მიზნით ფარული კენჭისყრის კაბინები უნდა მოეწყოს შემდეგნაირად: კენჭისყრის კაბინა ერთი მხრიდან გახსნილი დარჩეს (ამომრჩევლისთვის შესასვლელი) და გახსნილი მხარე მიმართული იყოს კენჭისყრის შენობის კედლისკენ იმდგვარად, რომ არ დაირღვეს კენჭისყრის ფარულობის პრინციპი.

- თვალსაჩინო ადგილას უნდა დაიდგას საარჩევნო ყუთი/ყუთები, რომელზეც კენჭისყრის დღეს მაგრდება ხმის ელექტრონული მთვლეელი აპარატი/აპარატები.
- საარჩევნო ყუთთან ახლოს უნდა დაიდგას მაგიდა, რომელზეც ამომრჩეველი ხმის მიცემის შემდეგ განათავსებს სპეციალურ ჩარჩო-კონვერტს.
- უნდა გამოიყოს ადგილი ფოტოვიდეოგადაღებისთვის (მიზანშეწონილია გამოიკრას წარწერა - ფოტოვიდეოგადაღების ადგილი).
- კენჭისყრის შენობაში თვალსაჩინო ადგილას გამოკრული უნდა იყოს:
 - ინფორმაცია ვირუსის გავრცელების პრევენციული ღონისძიებების შესახებ;
 - ამომრჩეველთა ერთიანი სიის საჯარო ინფორმაციისთვის მიკუთვნებული ვერსია (კედლის სია);
 - ამომრჩეველთა სპეციალური სიის (ასეთის არსებობის შემთხვევაში) საჯარო ინფორმაციისთვის მიკუთვნებული ვერსია (კედლის სია);
 - გადასატანი საარჩევნო ყუთის სიის (ასეთის არსებობის შემთხვევაში) საჯარო ინფორმაციისთვის მიკუთვნებული ვერსია (კედლის სია);
 - კანდიდატთა სიები;
 - ხმის მიცემის ინსტრუქცია და ცესკოს მიერ განკარგულებით დამტკიცებული საარჩევნო ბიულეტენის შევსების წესი;
 - ამონარიდი ცესკოს დადგენილებიდან, თუ რა შემთხვევაშია საარჩევნო ბიულეტენი ბათილი;
 - კენჭისყრის შედეგების სადემონსტრაციო ოქმი;
 - თუ საარჩევნო ბიულეტენში შეტანილი რომელიმე საარჩევნო სუბიექტი აღარ მონაწილეობს არჩევნებში, განცხადება აღნიშნულის შესახებ კენჭისყრის შენობასა და ფარული კენჭისყრის კაბინებში.

2. საარჩევნო დოკუმენტაციის/ინვენტარის მიღებასთან დაკავშირებული უფლებამოსილებანი:

განსვადეთ: კენჭისყრის დაწყებამდე არაუგვიანეს 12 საათისა საოლქო საარჩევნო კომისიისგან უნდა მიიღოთ: საარჩევნო კომისიისათვის განკუთვნილი დაზუსტებული სიების საბოლოო ვერსიები (სამაგიდო სია ფოტოსურათებით); ამომრჩეველთა ვერიფიკაციის აპარატი/აპარატები, რომლებშიც ჩატვირთულია

შესაბამისი საარჩევნო უბნის საარჩევნო კომისიისთვის განკუთვნილი ამომრჩეველთა სია (სია ფოტოსურათებით). ერთ-ერთ ვერიფიკაციის აპარატში ასევე ჩატვირთული იქნება ამომრჩეველთა სპეციალური სია (არსებობის შემთხვევაში); 50-50 ცალად, თავფურცლის გარეშე შეფუთული საარჩევნო ბიულეტენები და ხმის მიცემისთვის განკუთვნილი სპეციალური ჩარჩო-კონვერტები; ვიდეოგადამღები მოწყობილობა ხმის დათვლის პროცესის აუდიოვიდეოფიქსაციის მიზნებისთვის (ვიდეოგადამღებ მოწყობილობაზე აღინიშნება შესაბამისი საარჩევნო უბნის ნომერი).

საუბნო საარჩევნო კომისიის თავმჯდომარის უფლებამოსილებანი კენჭისყრის დღეს (2 აპრილი)

ახალი კორონავირუსით (SARS-CoV-2) გამოწვეული ინფექციის (COVID-19) გავრცელების პრევენციის მიზნით, კენჭისყრის შენობაში შესვლის/გამოსვლის და შენობაში ყოფნის/გადაადგილებისას დასაცავი სანიტარიულ-ჰიგიენური მოთხოვნები:

- გააკონტროლეთ, რომ კენჭისყრის შენობაში ყოფნის უფლების მქონე პირი კენჭისყრის შენობაში არ იქნეს დაშვებული პირბადის გარეშე და კენჭისყრის შენობაში იმყოფებოდეს მხოლოდ პირბადის გამოყენებით.

გაითვალისწინეთ!

- ✓ პირბადის გამოყენება არ მოეთხოვება პირს, რომელსაც ჯანმრთელობის მდგომარეობის გამო უჭირს პირბადის ტარება, რაც დასტურდება სამედიცინო/ექიმის ცნობით, ან ავადმყოფობების შესახებ რაიმე ტიპის დამადასტურებელი დოკუმენტით (მ.შ., ფორმა №IV-100/ა და სხვ.).
- ✓ პირბადის ტარების წესის დარღვევის შემთხვევაში, დამრღვევს მიეცით გაფრთხილება. თუ გაფრთხილების მიუხედავად, პირი აგრძელებს კანონმდებლობით განსაზღვრული პირბადის ტარების წესის დარღვევას, მიუთითეთ დატოვოს კენჭისყრის შენობა. თუ დამრღვევი ნებაყოფლობით არ ასრულებს მითითებას კენჭისყრის შენობის დატოვების შესახებ, საუბნო საარჩევნო კომისია დადგენილი წესით იღებს გადაწყვეტილებას მისი კენჭისყრის შენობიდან გაძევების საკითხზე. კომისიის მდივანმა დამრღვევი პირის შესახებ ინფორმაცია უნდა აღნიშნოს საუბნო საარჩევნო კომისიის სარეგისტრაციო ჟურნალში.

06:45-08:00 საათი

- ☐ 06:45 საათზე გახსენით საარჩევნო უბანი, ტელეფონით შეატყობინეთ საოლქო საარჩევნო კომისიას საარჩევნო უბნის გახსნისა და კომისიის წევრთა კვორუმის (9 წევრი) თაობაზე.
- ☐ გადაეცით კომისიის მდივანს კენჭისყრის დღის ჩანაწერთა წიგნი, სარეგისტრაციო ჟურნალი, კენჭისყრის შედეგების შემაჯამებელი ოქმი და სადემონსტრაციო ოქმი (იკვრება თვალსაჩინო ადგილას).
- ☐ შეამოწმეთ კენჭისყრის შენობაში მყოფი უფლებამოსილი პირების სააკრედიტაციო მოწმობები (ძალაშია პირადობის მოწმობასთან ერთად). გახსოვდეთ, კენჭისყრის შენობაში ყოფნის უფლება აქვთ მხოლოდ კანონით განსაზღვრულ შესაბამის უფლებამოსილ პირებს.
- ☐ ყველას დასანახად შეამოწმეთ იმ პაკეტის მთლიანობა, რომელშიც მოთავსებულია კომისიის სპეციალური ბეჭედი და გახსენით ისინი. კომისიის მდივანს ბეჭდის ნომერი შეაქვს კენჭისყრის დღის ჩანაწერთა წიგნის მე-9 გვერდზე.
- ☐ ჩაატარეთ წილისყრა კომისიის წევრთა შორის ფუნქციების გასანაწილებლად.

გაითვალისწინეთ!

წილისყრაში არ მონაწილეობენ კომისიის თავმჯდომარე, კომისიის თავმჯდომარის მოადგილე, კომისიის მდივანი.

საარჩევნო ყუთისა და ხმის ელექტრონული მთვლელი აპარატის ზედამხედველობას ახორციელებს კომისიის თავმჯდომარის მოადგილე ან აუცილებლობის შემთხვევაში კომისიის თავმჯდომარის ან თავმჯდომარის მოადგილის დავალებით, კომისიის სხვა წევრი.

პირველ რიგში, ჩაატარეთ წილისყრა რეგისტრატორი კომისიის წევრების გამოსავლენად (არანაკლებ ერთი რეგისტრატორი ყოველ 800 ამომრჩეველზე). ამომრჩეველთა რეგისტრატორი კომისიის წევრის გამოსავლენად ჩასატარებელ წილისყრაში არ მონაწილეობენ პარტიების მიერ დანიშნული კომისიის წევრები. კომისიის

მდივანს წილისყრის შედეგები შეაქვს კენჭისყრის დღის ჩანაწერთა წიგნის მე-3 გვერდზე.

ყურადღება!

თუ წილისყრაში მონაწილე საოლქო საარჩევნო კომისიის მიერ არჩეულ კომისიის წევრთა რაოდენობა შეესაბამება წილისყრით გამოსავლენი ამომრჩეველთა რეგისტრატორი კომისიის წევრთა რაოდენობას, წილისყრა არ ტარდება და საოლქო საარჩევნო კომისიის მიერ არჩეულ კომისიის წევრებს ავტომატურად მიენიჭებათ ამომრჩეველთა რეგისტრატორი კომისიის წევრის ფუნქცია.

თუ წილისყრაში მონაწილე საოლქო საარჩევნო კომისიის მიერ არჩეულ კომისიის წევრთა რაოდენობა აღემატება წილისყრით გამოსავლენი ამომრჩეველთა რეგისტრატორი კომისიის წევრთა რაოდენობას, მაშინ ამომრჩეველთა რეგისტრატორები გამოვლინდებიან წილისყრით.

თუ წილისყრაში მონაწილე საოლქო საარჩევნო კომისიის მიერ არჩეულ კომისიის წევრთა რაოდენობა აღმოჩნდება წილისყრით გამოსავლენი ამომრჩეველთა რეგისტრატორი კომისიის წევრთა რაოდენობაზე ნაკლები, წილისყრა არ ტარდება, საოლქო საარჩევნო კომისიის მიერ არჩეულ კომისიის წევრებს ავტომატურად მიენიჭებათ ამომრჩეველთა რეგისტრატორი კომისიის წევრის ფუნქცია და საუბნო საარჩევნო კომისიის თავმჯდომარე ამომრჩეველთა რეგისტრატორი კომისიის წევრის ფუნქციის შესრულებას ავალებს საუბნო საარჩევნო კომისიის სხვა წევრს/წევრებს.

- ☐ ჩაატარეთ მორიგი წილისყრა კომისიის წევრებს შორის გადასატანი საარჩევნო ყუთის წამლები კომისიის 2 წევრის გამოსავლენად. კომისიის მდივანს წილისყრის შედეგები შეაქვს კენჭისყრის დღის ჩანაწერთა წიგნის მე-3 გვერდზე.

გახსოვდეთ, თუ წილისყრით გამოვლენილი გადასატანი ყუთის წამლები კომისიის წევრი უარს განაცხადებს მისთვის მინიჭებული ფუნქციის შესრულებაზე, იგი კარგავს კომისიის წევრთა სხვა ფუნქციების გასანაწილებლად ჩასატარებელ მორიგ წილისყრაში მონაწილეობის მიღების უფლებას.

- ☐ ჩაატარეთ მორიგი წილისყრა კომისიის წევრთა შორის დარჩენილი ფუნქციების (ამომრჩეველთა ნაკადის მომწესრიგებელი, ხმის მიცემისთვის განკუთვნილი სპეციალური ჩარჩო - კონვერტების ზედამხედველი კომისიის წევრები) გასანაწილებლად. კომისიის მდივანს წილისყრის შედეგები შეაქვს კენჭისყრის დღის ჩანაწერთა წიგნის მე-3 გვერდზე.

- ☐ თუ კომისიის რომელიმე წევრი კომისიაში წილისყრის პროცედურის დასრულების შემდეგ გამოცხადდა, მისთვის ფუნქციის მინიჭების საკითხი გადაწყვიტეთ საჭიროებიდან გამომდინარე.

- ☐ გამოაცხადეთ ამომრჩეველთა რაოდენობა ამომრჩეველთა ერთიან სიაში, ამომრჩეველთა სპეციალურ სიაში, და გადასატანი საარჩევნო ყუთის სიაში (ასეთის არსებობის შემთხვევაში). კომისიის მდივანს მონაცემები შეაქვს კენჭისყრის დღის ჩანაწერთა წიგნის მე-7 და გვერდზე და კენჭისყრის შედეგების სადემონსტრაციო ოქმში (სადემონსტრაციო ოქმსა და კენჭისყრის დღის ჩანაწერთა წიგნში სპეციალურ სიაში ამომრჩეველთა რაოდენობა შეიტანება კენჭისყრის დასრულების შემდგომ).

- ☐ გამოაცხადეთ მიღებული საარჩევნო ბიულეტენების და ხმის მიცემისთვის განკუთვნილი სპეციალური ჩარჩო-კონვერტების რაოდენობები. კომისიის მდივანს მიღებული საარჩევნო ბიულეტენების რაოდენობა შეაქვს სადემონსტრაციო ოქმებში და კენჭისყრის დღის ჩანაწერთა წიგნის მე-7 გვერდზე.

- ☐ ამომრჩეველთა ვერიფიკაციის აპარატი/აპარატებში გააქტიურეთ ამომრჩეველთა ვერიფიკაციის პროცესი და აპარატიდან/აპარატებიდან ამობეჭდეთ საწყისი ანგარიში/ანგარიშები (ამობეჭდილი საწყისი ანგარიში/ანგარიშები შეინახეთ).

- ☐ ამომრჩეველთა ვერიფიკაციის აპარატი/აპარატებში ვერიფიკაციის პროცესის გააქტიურების შემდეგ, მიუთითეთ ამომრჩეველთა რეგისტრატორებს, რომ აპარატიდან/აპარატებიდან ამობეჭდონ ამომრჩეველთა სია. ამობეჭდილი სია/სიები გამოაკარით თვალსაჩინო ადგილას სადემონსტრაციო ოქმთან ერთად.

- ☐ შეამოწმეთ, რომ საარჩევნო ყუთები იყოს ცარიელი. დალუქეთ ძირითადი საარჩევნო ყუთი/ყუთები და გადასატანი საარჩევნო ყუთი (არსებობის შემთხვევაში) ინდივიდუალური ნომრის მქონე ლუქებით. ძირითად

საარჩევნო ყუთზე/ყუთებზე დაამონტაჟეთ ხმის ელექტრონული მთვლეელი აპარატი/აპარატები. კომისიის მდივანს საარჩევნო ყუთის ლუქების ნომრები და დალუქვის დრო შეაქვს კენჭისყრის დღის ჩანაწერთა წიგნის მე-4 გვერდზე.

☐ საარჩევნო ყუთის/ყუთების დალუქვის შემდეგ, ხმის ელექტრონული მთვლეელი აპარატიდან/აპარატებიდან ამობეჭდეთ დასტური („ნულოვანი ამონაწერი“), რომ იმ დროისთვის ამომრჩევლებს ხმა არ მიუციათ. მდივანთან ერთად ხელმოწერით დაადასტურეთ ამონაწერი და გადაეცით მდივანს შესანახად.

☐ კომისიის მდივანთან ერთად კენჭისყრის დღის ჩანაწერთა წიგნის მე-4 გვერდზე ხელმოწერით დაადასტურეთ ცარიელი ყუთების დალუქვის ფაქტი და ამონაწერში მოცემული ინფორმაცია იმის თაობაზე, რომ იმ მომენტისათვის აპარატის საშუალებით არცერთ ამომრჩეველს არ მიუცია ხმა.

☐ თითოეულ ამომრჩეველთან რეგისტრატორს გადაეცით: 50 ცალად შეფუთული საარჩევნო ბიულეტენების თითო შეკვრა (რეგისტრატორმა უნდა გადაამოწმოს შეკვრაში საარჩევნო ბიულეტენების რაოდენობის სიზუსტე და თავმჯდომარესთან ერთად ხელმოწერით დაადასტუროს მიღება-ჩაბარების აქტით); საარჩევნო ბიულეტენის შესავსებ სპეციალური მარკერი (ამომრჩევლისთვის საარჩევნო ბიულეტენის შევსების წესის განმარტების პროცესში საარჩევნო ბიულეტენზე ამომრჩევლის მიერ საცდელი წრის გაფერადების მიზნით); ხმის მიცემისთვის განკუთვნილი სპეციალური ჩარჩო-კონვერტები; მარკირების სითხე; ვერიფიკაციის აპარატიდან ამობეჭდილი ამომრჩევლების ვერიფიკაციის დამადასტურებელი ქვითრების მოსათავსებლად განკუთვნილი გაუმჭირვალე ყუთი (გადაცემამდე უნდა დალუქოთ აღნიშნული ყუთი/ყუთები).

გაითვალისწინეთ!

- ✓ რეგისტრატორების მაგიდასთან უნდა გამოიკრას ვერიფიკაციის აპარატში/აპარატებში ჩატვირთული ამომრჩეველთა სიების შესაბამისად ამომრჩეველთა გვარების ანბანური თანმიმდევრობა და ამომრჩეველთა ნომრების თანმიმდევრობა.
- ✓ რეგისტრატორებმა უნდა გადაამოწმონ საარჩევნო ბიულეტენების რაოდენობის სიზუსტე, რის შემდეგაც რეგისტრატორებთან ერთად ხელი უნდა მოაწეროთ ბიულეტენების მიღება-ჩაბარების აქტზე.
- ✓ ერთ-ერთი რეგისტრატორის მაგიდაზე განათავსეთ გამაღივებელი ღინზა მცირემხედველი ამომრჩევლებისთვის, ასევე, უსინათლო ამომრჩევლებისთვის განკუთვნილი სპეციალური ჩარჩო (ასეთის არსებობის შემთხვევაში).

☐ ამომრჩეველთა ნაკადის მომწესრიგებელს გადაეცით მარკირების შესამოწმებელი ულტრაიისფერი ფარანი.

☐ საარჩევნო ყუთისა და ხმის ელექტრონული მთვლეელი აპარატის ზედამხედველ კომისიის წევრს მიუთითეთ დაიკავოს ადგილი ძირითად საარჩევნო ყუთსა და ხმის ელექტრონულ მთვლელ აპარატთან.

☐ ხმის მიცემისთვის განკუთვნილი სპეციალური ჩარჩო-კონვერტების ზედამხედველ კომისიის წევრს მიუთითეთ დაიკავოს ადგილი სპეციალური ჩარჩო-კონვერტებისთვის განკუთვნილ მაგიდასთან.

08:00 საათიდან

☐ საარჩევნო უბანზე მოსვლისას პირველი ამომრჩეველი გადის რეგისტრაციას და იღებს საარჩევნო ბიულეტენს. პირველი ამომრჩევლის მიერ რეგისტრაციის გავლის შემდეგ ტელეფონით შეატყობინეთ საოლქო საარჩევნო კომისიას კენჭისყრის დაწყების შესახებ.

ხმის მიცემის პროცესის მიმდინარეობისას გაითვალისწინეთ:

- ამომრჩეველი ვალდებულია დროებით მოიხსნას პირბადე, კენჭისყრის ოთახში ამომრჩეველთა ნაკადის მომწესრიგებელი კომისიის წევრისთვის საქართველოს მოქალაქის პირადობის მოწმობის ან საქართველოს მოქალაქის პასპორტის წარდგენის დროს.

ყურადღება!

თუ ამომრჩეველი არ იხსნის პირბადეს, იგი არ დაიშვება კენჭისყრის შენობაში.

- თუ მარკირების შესამოწმებელმა სპეციალურმა ხელსაწყომ გამოავლინა, რომ ამომრჩეველს უკვე აქვს მარკირება, მას ეკრძალება კენჭისყრაში მონაწილეობა. კომისიის მდივანს ამომრჩევლის ვინაობა შეაქვს

კენჭისყრის დღის ჩანაწერთა წიგნის მე-4 გვერდზე.

- ამომრჩეველი ვალდებულია დროებით მოიხსნას პირბადე, რათა ამომრჩეველთა რეგისტრატორმა მოახდინოს ამომრჩეველის სახის შესაბამისობის დადგენა პირადობის დამადასტურებელ დოკუმენტში არსებული ფოტოსურათთან.

ყურადღება!

თუ ამომრჩეველი არ იხსნის პირბადეს, მასზე არ გაიცემა საარჩევნო ბიულეტენი.

- თუ ამომრჩეველთა რეგისტრატორმა ამომრჩეველის სახე პირადობის დამადასტურებელ დოკუმენტში არსებული ფოტოსურათი ერთმანეთთან შეუსაბამოდ მიიჩნია, მან უნდა მოგმართოთ თქვენ აღნიშნული შეუსაბამობის დადასტურების თაობაზე.

ყურადღება!

თუ ამომრჩეველთა რეგისტრატორმა ამომრჩეველის სახე და წარდგენილ დოკუმენტში არსებული ფოტოსურათი ერთმანეთთან შეუსაბამოდ მიიჩნია, იგი მიმართავს საუბნო საარჩევნო კომისიის თავმჯდომარეს, რომელიც ქვემოთ განსაზღვრული შესაბამისი პროცედურის შესრულების შემდეგ ამომრჩეველს მისცემს კენჭისყრაში მონაწილეობის უფლებას.

თუ საუბნო საარჩევნო კომისიის თავმჯდომარე დაადასტურებს აღნიშნულ შეუსაბამობას, საუბნო საარჩევნო კომისიის მდივანი კენჭისყრის დღის ჩანაწერთა წიგნში საამისოდ განკუთვნილ გვერდზე აკეთებს ჩანაწერს, რომელშიც აღნიშნავს შეუსაბამობის ფაქტს, ამომრჩეველის სახელს, გვარს და ამომრჩეველთა სიაში მის რიგით ნომერს. ეს ჩანაწერი დასტურდება საუბნო საარჩევნო კომისიის თავმჯდომარისა და კომისიის მდივნის ხელმოწერებით.

თუ საუბნო საარჩევნო კომისიის თავმჯდომარე არ დაადასტურებს აღნიშნულ შეუსაბამობას, ამომრჩეველთა რეგისტრატორს უფლება აქვს, კენჭისყრის დღის ჩანაწერთა წიგნში საამისოდ განკუთვნილ გვერდზე ჩაწეროს თავისი განსაკუთრებული აზრი.

აღნიშნულ შემთხვევებში საუბნო საარჩევნო კომისიის მდივანი ჩანაწერთა წიგნს დაურთავს ამომრჩეველის მიერ წარდგენილი დოკუმენტის ფოტოასლს, რომელსაც დაამოწმებს ხელმოწერით.

- შესაბამისობის დადასტურების შემთხვევაში, ამომრჩეველთა რეგისტრატორი საქართველოს მოქალაქის პირადობის ელექტრონულ მოწმობას (ID ბარათი) ატარებს ამომრჩეველთა ვერიფიკაციის აპარატის MRZ წამკითხველში (მოქალაქის პირადობის დამადასტურებელი ელექტრონული მოწმობის წაკითხვადი ზონა). ამომრჩეველთა ვერიფიკაციის აპარატი ამომრჩეველის მიერ წარდგენილ პირადობის დამადასტურებელ დოკუმენტში არსებულ ამომრჩეველის სარეგისტრაციო მონაცემებს ადარებს აღნიშნულ აპარატში ჩატვირთულ ამომრჩეველთა სიაში არსებულ მონაცემებს და მონაცემების შესაბამისობის შემთხვევაში, აპარატს ეკრანზე გამოაქვს ამ ამომრჩეველის მონაცემები.

ყურადღება!

თუ ამომრჩეველი ამომრჩეველთა რეგისტრატორს წარუდგენს საქართველოს მოქალაქის არაელექტრონულ პირადობის მოწმობას, ან საქართველოს მოქალაქის პასპორტს, ამომრჩეველთა რეგისტრატორი ამომრჩეველის მონაცემთა ძებნას აპარატში ახორციელებს ხელით.

- ვერიფიკაციის აპარატის მიერ ამომრჩეველის მონაცემთა შესაბამისობის დადასტურების შემთხვევაში ამომრჩეველთა რეგისტრატორი ამომრჩეველს უკეთებს მარკირებას. ამის შემდგომ ამომრჩეველთა რეგისტრატორი ვერიფიკაციის აპარატიდან ბეჭდავს ამომრჩეველის ვერიფიკაციის დამადასტურებელ ქვითარს, რომელზეც ხელს აწერს ამომრჩეველი. აღნიშნულ ქვითარს რეგისტრატორი ათავსებს სარეგისტრაციო მაგიდაზე განთავსებულ გაუმჭირვალე დალუქულ ყუთში.

ყურადღება!

- ✓ მარკირების პროცედურის გავლაზე უარის თქმის შემთხვევაში ამომრჩეველს არ აქვს კენჭისყრაში მონაწილეობის უფლება და მას საარჩევნო ბიულეტენი არ გადაეცემა;
- ✓ თუ ვერიფიკაციის აპარატი დააფიქსირებს, რომ კენჭისყრის შენობაში ხმის მისაცემად გამოცხადებული ამომრჩეველი შეყვანილია გადასატანი საარჩევნო ყუთის სიაში, ან სხვა უბნისთვის განკუთვნილ სპეციალურ სიაში, მას საარჩევნო უბანში აეკრძალება კენჭისყრაში მონაწილეობა;
- ✓ ამომრჩეველი, რომელსაც ერთიან სიაში მინიჭებული აქვს სტატუსი „იმყოფება უცხოეთში“ ან „საკონსულო აღრიცხვაზე“ კენჭისყრაში მონაწილეობას იღებს ზოგადი წესით.

- თუ ამომრჩეველს ან საუბნო საარჩევნო კომისიის წევრს გაუფუჭდა საარჩევნო ბიულეტენი, მიეცით მითითება

ამომრჩეველთა რეგისტრატორს, რომ ამომრჩეველს შეუცვალოს გაფუჭებული საარჩევნო ბიულეტენი ახლით. გაფუჭებულ ბიულეტენს ამომრჩევლის თანდასწრებით ჩამოაჭერით კუთხე, დააწერეთ „გაფუჭებულია“, ხელი მოაწერეთ და ცალკე შეინახეთ.

- თუ ამომრჩეველს არ შეუძლია საარჩევნო ბიულეტენის დამოუკიდებლად შევსება, ყურადღება მიაქციეთ, რომ კენჭისყრის კაბინაში დასახმარებლად არ იქნას მიწვეული საარჩევნო კომისიის წევრი, კანდიდატი, საარჩევნო სუბიექტის წარმომადგენელი, პრესისა და მასობრივი ინფორმაციის სხვა საშუალებების წარმომადგენელი და დამკვირვებელი. ამომრჩევლისთვის დახმარების აღმოჩენა შეუძლია ნებისმიერ პირს, გარდა ზემოთ აღნიშნული პირებისა.
- თუ ამომრჩეველი ფიზიკური მდგომარეობის გამო (ზედა კიდურების არქონა) ვერ ახერხებს ხმის მიცემის პროცედურების დამოუკიდებლად შესრულებას, ამ შემთხვევაში შეახსენეთ ამომრჩეველთა რეგისტრატორს, რომ ამომრჩევლისათვის საარჩევნო ბიულეტენის გადაცემისას ამომრჩევლის ვერიფიკაციის დამადასტურებელ ქვითარზე „ამომრჩევლის ხელმოწერა“ გააკეთოს ჩანაწერი „ფიზიკური მდგომარეობა“ და აღნიშნული ჩანაწერი ხელმოწერით დაადასტუროს.
- ყურადღება მიაქციეთ, რომ ხმის მიცემისთვის განკუთვნილი სპეციალური ჩარჩო-კონვერტის ზედამხედველმა ამომრჩევლის მიერ გამოყენებული სპეციალური ჩარჩო-კონვერტები დროულად გადასცეს რეგისტრატორებს, რათა არ შეფერხდეს კენჭისყრის პროცესი.
- თუ ხმის ელექტრონული მთვლეელი აპარატი უკან დააბრუნებს საარჩევნო ბიულეტენს, იგი ჩაითვლება გაფუჭებულად, ცალკე შეინახება და კენჭისყრის დასრულების შემდეგ დაემატება გაფუჭებული საარჩევნო ბიულეტენების რაოდენობას. რეგისტრატორი ვალდებულია შეუცვალოს ამომრჩეველს გაფუჭებული საარჩევნო ბიულეტენი ახალი საარჩევნო ბიულეტენით.

გაითვალისწინეთ! თუ აღმოჩნდა, რომ ხმის ელექტრონული მთვლეელი აპარატის მიერ უკან დაბრუნებული ბიულეტენი არის დაუდგენელი ნიმუშის, აღნიშნული არ დაემატება გაფუჭებული საარჩევნო ბიულეტენების რაოდენობას და გადაიდება ცალკე. თუ აღმოჩნდა, რომ ხმის ელექტრონული მთვლეელი აპარატის მიერ უკან დაბრუნებული საარჩევნო ბიულეტენი არის სხვა უბნისთვის განკუთვნილი, ასეთ შემთხვევაშიც აღნიშნული საარჩევნო ბიულეტენი არ დაემატება გაფუჭებული საარჩევნო ბიულეტენების რაოდენობას, გადაიდება ცალკე და მისი რაოდენობა აღინიშნება მხოლოდ კენჭისყრის დღის ჩანაწერთა წიგნში.

ამომრჩეველთა ვერიფიკაციის/ხმის ელექტრონული მთვლეელი აპარატის გამოყენების გარეშე ხმის მიცემის პროცესის მიმდინარეობისას გაითვალისწინეთ:

- იმ შემთხვევაში, თუ ტექნიკური ხარვეზის გამო შეფერხდა ამომრჩეველთა ვერიფიკაციის აპარატით/ხმის ელექტრონული მთვლეელი აპარატით კენჭისყრის პროცესი, იღებთ გადაწყვეტილებას კენჭისყრის პროცესის დროებით შეჩერების შესახებ. ინფორმაცია დაუყოვნებლივ შეატყობინეთ ზემდგომ საოლქო საარჩევნო კომისიას.
- თუ შეუძლებელი გახდა ამომრჩეველთა ვერიფიკაციის აპარატით/ხმის ელექტრონული მთვლეელი აპარატით კენჭისყრის გაგრძელება, კომისია ადგენს აქტს შესაბამისი აპარატის/აპარატების გამოყენების გარეშე კენჭისყრის გაგრძელების თაობაზე. კომისიის მდივანს შესაბამისი ჩანაწერი შეაქვს კენჭისყრის დღის ჩანაწერთა წიგნის 32-ე გვერდზე.

გაითვალისწინეთ!

- ✓ ხმის ელექტრონული მთვლეელი აპარატის გამოყენების გარეშე კენჭისყრის გაგრძელების მიზნით, კენჭისყრის შენობაში ყოფნის უფლების მქონე პირების თანდასწრებით, მოხსენით ხმის ელექტრონული მთვლეელი აპარატი ძირითადი საარჩევნო ყუთიდან, რომელსაც აქვს საარჩევნო ბიულეტენის მოსათავსებლად სპეციალური ჭრილი (ამომრჩეველს შესაძლებლობა აქვს საარჩევნო ბიულეტენი მოათავსოს პირდაპირ საარჩევნო ყუთში).
- ✓ ამომრჩეველთა ვერიფიკაციის აპარატის გამოყენების გარეშე კენჭისყრის გაგრძელების შემთხვევაში, შესაბამის ამომრჩეველთა რეგისტრატორ კომისიის წევრს/წევრებს გადაეცით საარჩევნო კომისიისთვის განკუთვნილი ამომრჩეველთა სია/სიები (სამაგიდო სია ფოტოსურათებით); ერთ-ერთ რეგისტრატორს აგრეთვე გადაეცით ამომრჩეველთა სპეციალური სია (ასეთის არსებობის შემთხვევაში). გახსენით ვერიფიკაციის აპარატიდან ამობეჭდილი ამომრჩევლების ვერიფიკაციის დამადასტურებელი ქვითრების მოსათავსებლად განკუთვნილი გაუმჭირვალე დალუქული ყუთი/ყუთები. მიუთითეთ რეგისტრატორს/რეგისტრატორებს აღნიშნულ ყუთში/ყუთებში მოთავსებული ქვითრების საფუძველზე

სიაში/სიებში შესაბამის ამომრჩეველთა გასწვრივ რეგისტრატორის გრაფაში გააკეთოს/გააკეთონ ხელმოწერა. პროცედურის დასრულებისთანავე, ამომრჩეველების ვერიფიკაციის დამადასტურებელი ქვითრები ხელახლა თავსდება აღნიშნული დოკუმენტაციისთვის განკუთვნილ გაუმჭირვალე ყუთში/ყუთებში, რის შემდეგაც უნდა დაილუქოს აღნიშნული ყუთი/ყუთები, მათ შორის, ყუთის/ყუთების ჭრილი. საჭიროების შემთხვევაში, თქვენი დავალებით საარჩევნო კომისიის წევრი/წევრები ასრულებს/ასრულებენ ამომრჩეველთა რეგისტრატორი კომისიის წევრის ფუნქციას.

✓ ამომრჩეველთა ვერიფიკაციის აპარატის გამოყენების გარეშე კენჭისყრის გაგრძელების შემთხვევაში, რეგისტრატორების მაგიდასთან გამოაკარით რეგისტრატორების მაგიდაზე განლაგებული სიების შესაბამისად ამომრჩეველთა გვარების ანბანური თანმიმდევრობა და ამომრჩეველთა ნომრების თანმიმდევრობა.

■ ამომრჩეველთა ვერიფიკაციის აპარატის გარეშე კენჭისყრის გაგრძელების შემთხვევაში, ამომრჩეველთა რეგისტრატორი კომისიის წევრი ამომრჩეველთა რეგისტრაციას ახორციელებს შემდეგი წესის დაცვით:

- ✓ სთხოვს ამომრჩეველს, წარმოადგინოს საქართველოს მოქალაქის პირადობის მოწმობა ან საქართველოს მოქალაქის პასპორტი;
- ✓ ამომრჩეველი ვალდებულია დროებით მოიხსნას პირბადე და ამომრჩეველთა რეგისტრატორი კომისიის წევრი ამოწმებს საქართველოს მოქალაქის პირადობის მოწმობაში ან საქართველოს მოქალაქის პასპორტში აღნიშნული ამომრჩევლის სარეგისტრაციო მონაცემების შესაბამისობას ამომრჩეველთა სიაში არსებულ მონაცემებთან;
- ✓ ამომრჩეველთა სიაში ამომრჩევლის შესახებ მონაცემების შესაბამისობის დადასტურების შემთხვევაში ახორციელებს მის მარკირებას;
- ✓ რეგისტრატორი ხელს აწერს ამომრჩეველთა ერთიანი სიის სათანადო გრაფაში;
- ✓ რეგისტრატორი მიუთითებს ამომრჩეველს, რომ ახალი კორონავირუსით გამოწვეული ინფექციის გავრცელების პრევენციის მიზნით, საარჩევნო ბიულეტენის მიღება ამომრჩეველთა სიაში ხელმოწერით დააფიქსიროს რეგისტრატორის მაგიდაზე განთავსებული ინდივიდუალური მოხმარებისთვის განკუთვნილი კალმისტრით, რის შემდეგაც ამომრჩეველს გადასცემს საარჩევნო ბიულეტენს და ხმის მიცემისთვის განკუთვნილ სპეციალურ ჩარჩო-კონვერტს;

ყურადღება!

თუ კენჭისყრის პროცესში გამოვლინდა, რომ ამომრჩეველმა საარჩევნო სიაში ხელი მოაწერა სხვა ამომრჩევლის გვარის გასწვრივ არსებულ გრაფაში, ასეთ შემთხვევაში ამომრჩეველს, რომლის გვარის გასწვრივ ფიქსირდება ხელმოწერა, უნდა მიეთითოს, ხელი მოაწეროს იმავე გრაფაში. ამასთან, მიუთითეთ ამომრჩეველთა რეგისტრატორს, აღნიშნულის თაობაზე დაწეროს ახსნა-განმარტება (ამომრჩევლის სახელის, გვარის და ამომრჩეველთა სიაში მისი რიგითი ნომრის მითითებით);

თუ ამომრჩეველი ფიზიკური მდგომარეობის გამო (ზედა კიდურების არქონა) ვერ ახერხებს ხმის მიცემის პროცედურების დამოუკიდებლად შესრულებას, ამ შემთხვევაში შეახსენეთ ამომრჩეველთა რეგისტრატორს, რომ ამომრჩევლისათვის საარჩევნო ბიულეტენის გადაცემისას შესაბამისი სიის გრაფაში „ამომრჩევლის ხელმოწერა“ გააკეთოს ჩანაწერი „ფიზიკური მდგომარეობა“ და აღნიშნული ჩანაწერი ხელმოწერით დაადასტუროს.

09:00 საათიდან

□ გადასატანი საარჩევნო ყუთის მეშვეობით კენჭისყრის ჩატარება დაავალეთ წილისყრით გამოვლენილ კომისიის 2 წევრს და მათ გადაეცით:

- დალუქული გადასატანი საარჩევნო ყუთი;
- გადასატანი საარჩევნო ყუთის სია;
- საჭირო რაოდენობის საარჩევნო ბიულეტენები;
- საარჩევნო ბიულეტენის შესავსები სპეციალური მარკერები;
- ხმის მიცემისთვის განკუთვნილი სპეციალური ჩარჩო-კონვერტები (გადასატანი საარჩევნო ყუთის სიაში არსებული ამომრჩეველების რაოდენობის შესაბამისად);
- ამომრჩეველებისთვის ინდივიდუალური მოხმარებისთვის განკუთვნილი კალმისტრები (გადასატანი საარჩევნო ყუთის სიაში არსებული ამომრჩეველების შესაბამისად, სიაში ამომრჩევლის მიერ ხელმოწერის დაფიქსირების მიზნებისთვის);
- ლითონის სამაგრი (ლითონის სამაგრით მაგრდება სპეციალურ ჩარჩო-კონვერტი, მასში ამომრჩევლის მიერ

საარჩევნო ბიულეტენის მოთავსების შემდგომ. ასეთი ფორმით თავსდება სპეციალურ ჩარჩო-კონვერტი გადასატან საარჩევნო ყუთში);

- გადასატანი საარჩევნო ყუთის ჭრილის ლუქი (გადასატანი საარჩევნო ყუთის ჭრილი ილუქება გადასატანი საარჩევნო ყუთის მეშვეობით კენჭისყრის დასრულების შემდგომ).

კომისიის მდივანს კენჭისყრის დღის ჩანაწერთა წიგნის მე-4 გვერდზე შეაქვს გადასატანი საარჩევნო ყუთის თანმხლები კომისიის წევრებისთვის გადაცემული საარჩევნო ბიულეტენებისა და ხმის მიცემისთვის განკუთვნილი სპეციალური ჩარჩო-კონვერტების რაოდენობა, ასევე გადასატანი საარჩევნო ყუთის საარჩევნო უბნიდან წაღების დრო.


გაითვალისწინეთ!

გადასატანი საარჩევნო ყუთის წამლები საუბნო საარჩევნო კომისიის წევრები და მეთვალყურეები გადასატანი საარჩევნო ყუთით ხმის მიცემის პროცესში აღჭურვილი უნდა იყვნენ და უნდა გამოიყენონ პირბადე, სახის დამცავი ფარი, ხელთათმანები და ხელის სადუზინფექციო ხსნარი.

10:00, 12:00, 15:00 და 17:00 საათზე

სთხოვეთ ამომრჩეველთა რეგისტრატორს/რეგისტრატორებს, კენჭისყრის პროცესისთვის ხელის შეუშლელად 10:00, 12:00, 15:00, 17:00 საათზე ამომრჩეველთა ვერიფიკაციის აპარატიდან/აპარატებიდან ამობეჭდონ ანგარიში/ანგარიშები. ასევე, გადაითვალონ მათ მიერ გაცემული საარჩევნო ბიულეტენების რაოდენობა (კომისიის თავმჯდომარისთვის გადაცემული გაფუჭებული საარჩევნო ბიულეტენების რაოდენობის ჩათვლით). გაცემული საარჩევნო ბიულეტენების რაოდენობის დადგენა შესაძლებელია კომისიის თავმჯდომარისგან მიღებული საარჩევნო ბიულეტენების რაოდენობასთან რეგისტრატორთან დარჩენილი საარჩევნო ბიულეტენების რაოდენობის შედარებით.

რეგისტრატორების მიერ დათვლილი მონაცემები შეადარეთ ვერიფიკაციის აპარატიდან/აპარატებიდან ამობეჭდილ ანგარიშში/ანგარიშებში მითითებულ კენჭისყრაში მონაწილე ამომრჩეველთა რაოდენობას:



თუ მონაცემებს შორის სხვაობა გამოვლინდა, ამომრჩეველთა რეგისტრატორმა დაუყოვნებლივ უნდა დაწეროს ახსნა-განმარტება, ხოლო მასში ასახული მონაცემები გაითვალისწინოთ კენჭისყრის შედეგების შემაჯამებელი ოქმის შევსებისას.

თუ საარჩევნო უბანში კენჭისყრის პროცესი გაგრძელდა ამომრჩეველთა ვერიფიკაციის აპარატის გარეშე, 10:00, 12:00, 15:00, 17:00 საათზე კენჭისყრაში/არჩევნებში მონაწილე ამომრჩეველთა რაოდენობისა და კენჭისყრაში/არჩევნებში მონაწილე ამომრჩეველთა საერთო რაოდენობის დადგენა ხდება საუბნო საარჩევნო კომისიისთვის განკუთვნილ ამომრჩეველთა სიებში ხელმოწერების მიხედვით (რეგისტრატორების მიერ დაწერილ ახსნა-განმარტებებში აღნიშნული მონაცემების გათვალისწინებით).

რეკომენდაცია!

ანალოგიური წესით მოხდეს რეგისტრატორებისგან მონაცემების მიღება და გადამოწმება 20:00 საათზე.

საარჩევნო უბანში კენჭისყრის პროცესის მიმდინარეობისას (ამომრჩეველთა ვერიფიკაციის აპარატით ან აპარატის გარეშე), 12:00 და 17:00 საათის მდგომარეობით, კენჭისყრაში/არჩევნებში მონაწილე ამომრჩეველთა რაოდენობა საარჩევნო კომისიის მდივანს შეაქვს კენჭისყრის შედეგების სადემონსტრაციო ოქმსა და კენჭისყრის დღის ჩანაწერთა წიგნში.

რეკომენდაცია!

რეგისტრატორებისგან მიღებული მონაცემების აღრიცხვის მიზნით შესაძლებელია გამოიყენოთ ნიმუშის სახით წარმოდგენილი ცხრილი (დანართი N1).

20:00 საათამდე

გადასატანი საარჩევნო ყუთი საარჩევნო უბანზე უნდა დაბრუნდეს არაუგვიანეს 20 საათისა. გადასატანი საარჩევნო ყუთის საარჩევნო უბანში დაბრუნებისთანავე მიუთითეთ კომისიის მდივანს შეამოწმოს გადასატანი

საარჩევნო ყუთის სიაში არსებული ხელმოწერების, გამოუყენებელი ან/და გაფუჭებული საარჩევნო ბიულეტენების რაოდენობის სისწორე. უზუსტობის აღმოჩენის შემთხვევაში გადასატანი საარჩევნო ყუთის თანმხლებმა კომისიის წევრებმა უნდა დაწერონ ახსნა-განმარტება მიზეზის მითითებით. ახსნა-განმარტებაში ასახული მონაცემები გაითვალისწინეთ კენჭისყრის შედეგები შემოწმებული ოქმის შევსებისას.

გამოუყენებელ საარჩევნო ბიულეტენებს ჩამოაჭრით კუთხე, დააწერეთ გაფუჭებულია და ხელი მოაწერეთ. კომისიის მდივანს, ამომრჩეველთა ხელმოწერების რაოდენობა გადასატანი საარჩევნო ყუთის სიაში, გამოუყენებელი საარჩევნო ბიულეტენების რაოდენობა, ასევე საარჩევნო უბანში საარჩევნო ყუთის დაბრუნების დრო შეაქვს კენჭისყრის დღის ჩანაწერთა წიგნის მე-4 გვერდზე.

20:00 საათიდან ძირითადი საარჩევნო ყუთის გახსნამდე

- ❑ 20:00 საათზე კენჭისყრა დასრულებულად გამოაცხადეთ. დაავალეთ კომისიის ერთ-ერთ წევრს, დაითვალოს რიგში მდგომი ამომრჩეველების რაოდენობა (ასეთის არსებობის შემთხვევაში). კომისიის მდივანს აღნიშნული მონაცემი შეაქვს კენჭისყრის დღის ჩანაწერთა წიგნის მე-4 გვერდზე. კენჭისყრის დასრულების შემდეგ დახურეთ საარჩევნო უბნის კარი.

- ❑ კენჭისყრის დასრულებისთანავე, ამომრჩეველთა ვერიფიკაციის აპარატი/აპარატებში დაასრულეთ ვერიფიკაციის პროცესი, აპარატიდან/აპარატებიდან ამობეჭდეთ საბოლოო ანგარიში/ანგარიშები და შეინახეთ ხმების დათვლის პროცესისთვის. დალუქეთ ამომრჩეველთა ვერიფიკაციის დამადასტურებელი ქვითრების მოსათავსებლად განკუთვნილი გაუმჭირვალე ყუთის/ყუთების ჭრილი.

საოლქო საარჩევნო კომისიას აცნობეთ კენჭისყრაში/არჩევნებში მონაწილე ამომრჩეველთა საერთო რაოდენობა, მათ შორის კენჭისყრაში მონაწილე ამომრჩეველთა გენდერული მონაცემები.

ყურადღება!

კენჭისყრაში/არჩევნებში მონაწილე ამომრჩეველთა საერთო რაოდენობის დადგენის მიზნით, ამობეჭდილ ანგარიშში/ანგარიშებში მითითებულ კენჭისყრაში მონაწილე ამომრჩეველთა რაოდენობას (რეგისტრატორების მიერ დაწერილ ახსნა-განმარტებებში აღნიშნული მონაცემების გათვალისწინებით) ემატება ამომრჩეველთა გადასატანი საარჩევნო ყუთის სიაში (ასეთის არსებობისას) ხელმოწერების ჯამი.

კომისიის ერთ-ერთ წევრს დაავალეთ კენჭისყრის დღეს შშმ ამომრჩეველთა არჩევნებში მონაწილეობის სტატისტიკის ცხრილის შევსება. სტატისტიკის წარმოება ხორციელდება მხოლოდ შშმ ამომრჩევლის ვიზუალური შეფასებით.

- ❑ მიუთითეთ კომისიის მდივანს კენჭისყრის დღის ჩანაწერთა წიგნის 26-ე და 27-ე გვერდებზე შეიტანოს ხმების დათვლის დროს კენჭისყრის შენობაში მყოფი პირების მონაცემები.
- ❑ შეამოწმეთ გადასატანი საარჩევნო ყუთის (ასეთის არსებობის შემთხვევაში) ლუქების მთლიანობა.

თუ გადასატანი საარჩევნო ყუთის ლუქის მთლიანობა დარღვეული არ არის, გადასატან საარჩევნო ყუთში არსებული საარჩევნო ბიულეტენები ხმის ელექტრონული მთვლეელი აპარატის საშუალებით მოათავსეთ ძირითად საარჩევნო ყუთში იმგვარად, რომ შეუძლებელი გახდეს ამომრჩევლის მიერ გაკეთებული არჩევანის დანახვა. ხმის ელექტრონული მთვლეელი აპარატის გამოყენების გარეშე ხმის მიცემის პროცედურის წარმართვის შემთხვევაში, გადასატან საარჩევნო ყუთში არსებული საარჩევნო ბიულეტენები მოათავსეთ ძირითად საარჩევნო ყუთში სპეციალური ჭრილის საშუალებით იმგვარად, რომ შეუძლებელი გახდეს ამომრჩევლის მიერ გაკეთებული არჩევანის დანახვა და დალუქეთ ძირითადი საარჩევნო ყუთის სპეციალური ჭრილი.

ყურადღება!

იმ შემთხვევაში, თუ საარჩევნო უბანში გამოყენებულია ერთზე მეტი ძირითადი საარჩევნო ყუთი, გადასატან საარჩევნო ყუთში არსებული საარჩევნო ბიულეტენები მოათავსეთ ერთ-ერთ ძირითად საარჩევნო ყუთში.

იმ შემთხვევაში, თუ გადასატანი საარჩევნო ყუთის ლუქის მთლიანობა დარღვეული აღმოჩნდა, მაგრამ კომისია მიიჩნევს, რომ ამას არ გამოუწვევია კანონის მოთხოვნათა დარღვევა, კომისიის განკარგულებით გრძელდება კენჭისყრის შედეგების შეჯამების პროცედურა (აღნიშნული ფაქტი დაუყოვნებლივ აცნობეთ

საოლქო საარჩევნო კომისიას). წინააღმდეგ შემთხვევაში გადასატანი საარჩევნო ყუთი დალუქეთ და საუბნო საარჩევნო კომისიის განკარგულებასთან ერთად დაუყოვნებლივ გადაეცით საოლქო საარჩევნო კომისიას.

ყურადღება!

- ✓ თუ ხმის ელექტრონული მთვლეელი აპარატი უკან აბრუნებს გადასატანი საარჩევნო ყუთიდან ამოღებულ საარჩევნო ბიულეტენს, ასეთი საარჩევნო ბიულეტენი ცალკე დაიდება იმგვარად, რომ შეუძლებელი გახდეს ამომრჩევლის მიერ გაკეთებული არჩევანის დანახვა და შემდგომ შეერევა ძირითადი საარჩევნო ყუთიდან/ყუთებიდან დათვლის მიზნებისთვის ამოღებულ საარჩევნო ბიულეტენებს.
- ✓ თუ გადასატანი საარჩევნო ყუთში სხვა საარჩევნო უბნისთვის განკუთვნილი ან დაუდგენელი ნიმუშის ბიულეტენი აღმოჩნდა, ცალკე დაიდება და ძირითად ყუთში აღმოჩენილ (ასეთის არსებობის შემთხვევაში) შესაბამის რაოდენობებს დაემატება.

- ☐ გადასატანი საარჩევნო ყუთში არსებული საარჩევნო ბიულეტენების ძირითად საარჩევნო ყუთში მოთავსების პროცედურის დასრულების შემდეგ, ხმის ელექტრონული მთვლეელი მიერ დათვლილი წინასწარი მონაცემების საფუძველზე, აპარატიდან/აპარატებიდან ამობეჭდეთ წინასწარი შედეგების შესახებ ამონაწერი, რომლის შესახებ ინფორმაცია დაუყოვნებლივ უნდა მიაწოდოთ საოლქო საარჩევნო კომისიას.

ყურადღება!

ერთდროულად ამოიბეჭდება ორი ამონაწერი, რომელთაგან ერთი გადაეცით კომისიის მდივანს კენჭისყრის დღის ჩანაწერთა წიგნში შესანახად, ხოლო მეორე გამოაკარით სადემონსტრაციო ოქმთან.

- ☐ ხმის დათვლის პროცედურის დაწყების მიზნით, კომისიის წევრებს შორის ჩაატარეთ წილისყრა ოთხი მთვლელის გამოსავლენად. კომისიის მდივანს წილისყრის შედეგები შეაქვს კენჭისყრის დღის ჩანაწერთა წიგნის მე-3 გვერდზე.

გაითვალისწინეთ!

საარჩევნო უბანზე მყოფ საარჩევნო სუბიექტების წარმომადგენლებს ავტომატურად ენიჭებათ უფლებამოსილება, კომისიის წევრთაგან წილისყრით გამოვლენილ მთვლელებთან ერთად მონაწილეობა მიიღონ ნამდვილი ან/და ბათილი საარჩევნო ბიულეტენების დათვლის პროცესში. გახსოვდეთ, მთვლელების გამოვლენის მიზნით ჩასატარებელ წილისყრაში არ მონაწილეობენ იმ საარჩევნო სუბიექტების მიერ დანიშნული კომისიის წევრები, რომლების წარმომადგენლებსაც ავტომატურად მიენიჭათ ნამდვილი ან/და ბათილი საარჩევნო ბიულეტენების დათვლის პროცესში მონაწილეობის უფლებამოსილება.

კომისიის მდივანს ინფორმაცია შეაქვს კენჭისყრის დღის ჩანაწერთა წიგნის მე-3 გვერდზე.

- ☐ თუ დამკვირვებლები თავიანთი შემადგენლობიდან ურთიერთშეთანხმებით ვერ შეარჩევენ საარჩევნო ბიულეტენების დათვლის პროცესის მეთვალყურე პირებს, დამკვირვებელთა შორის ჩაატარეთ წილისყრა 2 მეთვალყურის გამოსავლენად. კომისიის მდივანს შესაბამისი მონაცემები შეაქვს კენჭისყრის დღის ჩანაწერთა წიგნის მე-3 გვერდზე.

- ☐ მოაწყვეთ უბანი ხმების დასათვლელად. ახალი კორონავირუსით გამოწვეული ინფექციის გავრცელების პრევენციის მიზნით, მთვლელები მაგიდებთან უნდა განთავსდნენ ისე, რომ არ აღმოჩნდნენ ერთმანეთის პირისპირ.

- ☐ მიუთითეთ მთვლელებს, დაითვალონ ამომრჩეველთა ხელმოწერების რაოდენობა ამომრჩეველთა გადასატანი საარჩევნო ყუთის სიაში (ასეთის არსებობის შემთხვევაში).

საუბნო საარჩევნო კომისიის მდივანს კენჭისყრაში/არჩევნებში მონაწილე ამომრჩეველთა საბოლოო რაოდენობა დაუყოვნებლივ შეაქვს კენჭისყრის შედეგების სადემონსტრაციო ოქმსა და კენჭისყრის დღის ჩანაწერთა წიგნის მე-7 გვერდზე. კენჭისყრაში/არჩევნებში მონაწილე ამომრჩეველთა საბოლოო რაოდენობა დგინდება ვერიფიკაციის აპარატიდან/აპარატებიდან ამობეჭდილი საბოლოო ანგარიშის მონაცემების, გადასატანი საარჩევნო ყუთის სიის მიხედვით დათვლილი ამომრჩეველთა ხელმოწერების რაოდენობისა და რეგისტრატორების ახსნა-განმარტებებში მითითებული შესაბამისი მონაცემების გათვალისწინებით.

ყურადღება! თუ კენჭისყრის პროცესი ამომრჩეველთა ვერიფიკაციის აპარატის გარეშე წარიმართა, მთვლელები კენჭისყრაში მონაწილე ამომრჩეველთა საბოლოო რაოდენობის დადგენის მიზნით ითვლიან

- ☐ მიუთითეთ მთვლელებს ცალ-ცალკე დალუქონ ამომრჩეველთა გადასატანი საარჩევნო ყუთის სიის სამაგიდო ვერსია, ასევე გამოუყენებელი და გაფუჭებული საარჩევნო ბიულეტენების პაკეტები (კომისიის მდივანმა პაკეტში მოთავსებამდე გამოუყენებელ საარჩევნო ბიულეტენებს უნდა ჩამოაჭრას კუთხე).

დალუქვის ზოლზე ხელი მოაწერეთ მთვლელებთან ერთად. პაკეტზე მიუთითეთ საოლქო და საუბნო საარჩევნო კომისიების დასახელება და ნომერი, საარჩევნო დოკუმენტაციის სახე.

გახსოვდეთ!

- ✓ იმ შემთხვევაში, თუ კენჭისყრის პროცესი ამომრჩეველთა ვერიფიკაციის აპარატის გარეშე წარიმართა, მთვლელებმა ცალ-ცალკე პაკეტებში უნდა დალუქონ ამომრჩეველთა ერთიანი სია, ამომრჩეველთა სპეციალური სია (ასეთის არსებობისას).
- ✓ პასუხისმგებელი ხარტ საარჩევნო დოკუმენტაციის დადგენილი წესის შესაბამისად დალუქვაზე.

- ☐ საუბნო საარჩევნო კომისია ვალდებულია უზრუნველყოს ხმის დათვლის პროცესის (საარჩევნო ყუთის/ყუთების გახსნის მომენტიდან საარჩევნო ბიულეტენების დასტების დალუქვის მომენტის ჩათვლით) აუდიო-ვიდეოფიქსაცია. ამ მიზნით ვიდეოგადამღები მოწყობილობა განათავსეთ იმდგვარად, რომ სრულად ჩანდეს ხმის დათვლის პროცესი და საარჩევნო ბიულეტენების განთავსების ადგილი.

ყურადღება!

კენჭისყრის შენობაში ვიდეოგადამღები მოწყობილობის სათანადო წესით გამოყენებას და ხმის დათვლის პროცესის ვიდეოჩაწერას უზრუნველყოფს პარტიების მიერ დანიშნულ საუბნო საარჩევნო კომისიის წევრთაგან (რომლებიც საქართველოს პარლამენტის საპარლამენტო უმრავლესობაში არ შედიან) საოლქო საარჩევნო კომისიის მიერ კანონმდებლობით დადგენილი წესის შესაბამისად, წილისყრით გამოვლენილი საუბნო საარჩევნო კომისიის წევრი.

თუ წილისყრით გამოვლენილი საუბნო საარჩევნო კომისიის წევრი კენჭისყრის დღეს უარს განაცხადებს მისთვის მინიჭებული ფუნქციის შესრულებაზე, ან კენჭისყრის დღეს არ გამოცხადდება კენჭისყრის შენობაში, ვიდეოგადამღები მოწყობილობის სათანადო წესით გამოყენებას და ხმის დათვლის პროცესის ვიდეოჩაწერას უზრუნველყოფს საუბნო საარჩევნო კომისიის თავმჯდომარე ან მის მიერ განსაზღვრული საუბნო საარჩევნო კომისიის წევრი.

ვიდეოგადამღები მოწყობილობის ტექნიკური გაუმართაობის ანდა დაზიანების შემთხვევაში ხმის დათვლის პროცესი არ ჩერდება.

ძირითადი საარჩევნო ყუთის/ყუთების გახსნა, კენჭისყრის შედეგების შემოწმებული ოქმის შევსება

- ☐ შემოწმეთ ძირითადი საარჩევნო ყუთის/ყუთების ლუქების მთლიანობა.

ყურადღება!

თუ საარჩევნო ყუთების შემოწმებისას ლუქის მთლიანობა დარღვეული აღმოჩნდა, მაგრამ კომისია მიიჩნევს, რომ ამას არ გამოუწვევია კანონის მოთხოვნათა დარღვევა, კომისიის განკარგულებით გრძელდება კენჭისყრის შედეგების შეჯამების პროცედურა. წინააღმდეგ შემთხვევაში საარჩევნო ყუთი ილუქება და კომისიის განკარგულებით გადაეცემა ზემდგომ საოლქო საარჩევნო კომისიას.


თუ ყველაფერი წესრიგში აღმოჩნდა, გახსენით ძირითადი საარჩევნო ყუთი/ყუთები. იმ შემთხვევაში, თუ საარჩევნო უბანში გამოყენებულია ერთზე მეტი ძირითადი საარჩევნო ყუთი, მთვლელები ერთმანეთში ურევნ ძირითად საარჩევნო ყუთებიდან გადმოყრილ საარჩევნო ბიულეტენებს და იწყებენ საარჩევნო ბიულეტენების დათვლის პროცესს. შემდეგი წესის დაცვით: პირველი მთვლელი იღებს საარჩევნო ბიულეტენს და აცხადებს ვისთვისაა მიცემული ხმა, საარჩევნო ბიულეტენს საარჩევნო სუბიექტების მიხედვით გადასცემს მეორე და მესამე მთვლელს, ხოლო მეოთხე მთვლელს გადასცემს დაუდგენელი ნიმუშის/საეჭვო და ბათილ საარჩევნო ბიულეტენებს (ასეთის არსებობისას).

გაითვალისწინეთ!

- ✓ პირველი მთვლელი ვალდებულია საარჩევნო ბიულეტენი ხელში იმდგვარად დაიკავოს, რომ ვიდეოგადამღებ მოწყობილობას შეეძლოს საარჩევნო ბიულეტენის წინა გვერდის ფიქსაცია.
- ✓ საარჩევნო ბიულეტენების დახარისხების დასრულების შემდეგ კომისია განიხილავს და კენჭისყრით

- საარჩევნო ბიულეტენების დახარისხების შემდეგ მიუთითეთ მოვლელებს დაითვალონ: ბათილად მიჩნეული საარჩევნო ბიულეტენები; თითოეული საარჩევნო სუბიექტისათვის მიცემული ხმები.

- გამოაცხადეთ თითოეული საარჩევნო სუბიექტის მიერ მიღებული ხმებისა და ბათილი საარჩევნო ბიულეტენების რაოდენობა. კომისიის მდივანთან ერთად შეამოწმეთ მონაცემების სისწორე:



- კომისიის მდივანმა მიღებული შედეგები უნდა შეიტანოს კენჭისყრის დღის ჩანაწერთა წიგნის მე-7 გვერდზე და კენჭისყრის შედეგების სადემონსტრაციო ოქმში.

- ხმების დათვლის შემდეგ, მიუთითეთ მოვლელებს, ცალ-ცალკე პაკეტებად დალუქონ ბათილი საარჩევნო ბიულეტენები (მათ ეწერება „ბათილია“), საარჩევნო სუბიექტების კუთვნილი საარჩევნო ბიულეტენების დასტები. საარჩევნო ბიულეტენების პაკეტზე უნდა მიეთითოს საოლქო და საუბნო საარჩევნო კომისიების დასახელება და ნომერი, საარჩევნო ბიულეტენების რაოდენობა. პაკეტის დალუქვის ზოლზე ხელი მოაწერეთ მოვლელებთან ერთად.

- საარჩევნო უბნის კენჭისყრის შედეგები დასტურდება მხოლოდ საარჩევნო კოდექსით დადგენილი წესის შესაბამისად შედგენილი საუბნო საარჩევნო კომისიის კენჭისყრის შედეგების შემაჯამებელი ოქმით. კომისიის მდივანი თქვენთან შეთანხმებით ავსებს კენჭისყრის შედეგების შემაჯამებელ ოქმს. კენჭისყრის შედეგების შემაჯამებელი ოქმის შედგენისას გათვალისწინებული უნდა იქნეს ამომრჩეველთა რეგისტრატორების ახსნა-განმარტებებში (ასეთის არსებობის შემთხვევაში) მითითებული მონაცემები.

კომისიის ყველა წევრი ვალდებულია ხელი მოაწეროს კენჭისყრის შედეგების შემაჯამებელ ოქმს, რითაც დასტურდება მათი ყოფნა საარჩევნო უბანზე. კენჭისყრის შედეგების შემაჯამებელი ოქმი უნდა დაამოწმოს კომისიის სპეციალური ბეჭდით.

კომისიის მდივანი კენჭისყრის შედეგების შემაჯამებელ ოქმს რეგისტრაციაში ატარებს სარეგისტრაციო ჟურნალში გასული დოკუმენტაციის ნაწილში.

გაითვალისწინეთ!

საუბნო საარჩევნო კომისიის მიერ შედგენილი კენჭისყრის შედეგების შემაჯამებელი ოქმი იურიდიული ძალის მქონეა, თუ მას ხელი მოაწერა საუბნო საარჩევნო კომისიის წევრთა უმრავლესობამ.

აკრძალულია კენჭისყრის შედეგების შემაჯამებელ ოქმში შეტანილი მონაცემების გადასწორება.

კენჭისყრის შედეგების შემაჯამებელი ოქმისა და შესწორების ოქმის შედგენის წესი იხილეთ საუბნო საარჩევნო კომისიის წევრთა სახელმძღვანელო ინსტრუქციაში - ნაწილი III, თავი IV, ქვეთავი „კენჭისყრის შედეგების შემაჯამებელი ოქმის შედგენა“.

- კენჭისყრის შედეგების შემაჯამებელი ოქმის ფოტოასლების გაცემისას (მოთხოვნის შემთხვევაში) კომისიის მდივანთან ერთად ხელი მოაწერეთ და დაამოწმეთ კომისიის სპეციალური ბეჭდით. ფოტოასლების მიმღები პირი ჩანაწერთა წიგნში ხელმოწერით ადასტურებს მის მიღებას.

გაითვალისწინეთ! კენჭისყრის შედეგების შემაჯამებელ ოქმთან/შესწორების ოქმთან დაკავშირებული კომისიის წევრთა ახსნა-განმარტებები (ასეთის არსებობის შემთხვევაში), მოთხოვნის საფუძველზე გაიცემა საოლქო საარჩევნო კომისიის მიერ, მოთხოვნიდან 2 დღის ვადაში.

- ცალ-ცალკე პაკეტებად დალუქეთ:

- ✓ კენჭისყრის დღის ჩანაწერთა წიგნი და მასთან ერთად განცხადებები/საჩივრები (ასეთის არსებობისას), ხმის ელექტრონული მოვლელი აპარატიდან ამონაბეჭდები (დასტური, რომ ყუთების დალუქვამდე ამომრჩევლებს ხმა არ მიუციათ და წინასწარი შედეგების შესახებ ამონაწერი), ამომრჩეველთა

ვერიფიკაციის აპარტიდან/აპარატებიდან ამობეჭდილი საბოლოო ანგარიში/ანგარიშები;

- ✓ კომისიის სპეციალური ბეჭედი (კომისიის სპეციალური ბეჭდის დალუქულ პაკეტს კომისიის ყველა წევრი აწერს ხელს).

გახსოვდეთ! პასუხისმგებელი ხართ საარჩევნო დოკუმენტაციის/ინვენტარის დადგენილი წესის შესაბამისად დალუქვაზე. სარეგისტრაციო ჟურნალი და კენჭისყრის შედეგების შემაჯამებელი ოქმები არ ილუქება.

- დალუქული საარჩევნო დოკუმენტაცია დიდ ყუთში/ტომარაში მოათავსეთ და მიიტანეთ საოლქო საარჩევნო კომისიაში. ყუთისგან/ტომრისგან განცალკევებით წაიღეთ კენჭისყრის შედეგების შემაჯამებელი ოქმი, შესწორების ოქმთან ერთად (ასეთის არსებობის შემთხვევაში) და სარეგისტრაციო ჟურნალი, კომისიის წევრთა ახსნა-განმარტებებთან ერთად (ასეთის არსებობის შემთხვევაში), ასევე, კენჭისყრის დღის ჩანაწერთა წიგნის დალუქული პაკეტი.

ყურადღება!

საოლქო საარჩევნო კომისიას, საარჩევნო დოკუმენტაციასთან ერთად, უნდა გადასცეთ:

- ✓ ვიდეოგამღები მოწყობილობა ხმის დათვლის პროცესის ვიდეოჩანაწერთან ერთად, ამომრჩეველთა ვერიფიკაციის აპარატი/აპარატები, ხმების ელექტრონული მთვლელი აპარტი/აპარატები;
- ✓ ვერიფიკაციის აპარატიდან/აპარატებიდან ამობეჭდილი ამომრჩევლების ვერიფიკაციის დამადასტურებელი ქვითარების განსათავსებლად განკუთვნილი დალუქული ყუთი/ყუთები.

გაითვალისწინეთ!

საუბნო საარჩევნო კომისიის თავმჯდომარე ვალდებულია განცხადებაზე/საჩივარზე (ასეთის არსებობისას) დაუყოვნებლივ მოახდინოს სათანადო რეაგირება და აღმოფხვრას არსებული დარღვევა.

კენჭისყრის დღის განცხადებასთან/საჩივართან დაკავშირებით კომისიის თავმჯდომარის მიერ განსაზოგციელებელი უფლებამოსილებები დეტალურად იხილეთ საუბნო საარჩევნო კომისიის წევრთა სახელმძღვანელო ინსტრუქციის IV ნაწილი.

დანართი N1						
რეგისტრატორებისგან მიღებული მონაცემები ასახეთ ცხრილში						
გადაამოწმეთ მონაცემები		რეგისტრატორი				
		I	II	III	IV	V
10 სთ	გაცემული ბიულეტენები					
	გაფუჭებული ბიულეტენები					
	კენჭისყრაში მონაწილე ამომრჩეველთა რაოდენობა ვერიფიკაციის აპარატიდან ამობეჭდილი ანგარიშის მიხედვით/აპარატის გარეშე კენჭისყრის წარმართვისას - ხელმოწერების რაოდენობა ყველა სახის სიაში					
	ხელმოწერების რაოდენობა ახსნა-განმარტებების მიხედვით					
12 სთ	გაცემული ბიულეტენები					
	გაფუჭებული ბიულეტენები					
	კენჭისყრაში მონაწილე ამომრჩეველთა რაოდენობა ვერიფიკაციის აპარატიდან ამობეჭდილი ანგარიშის მიხედვით/აპარატის გარეშე კენჭისყრის წარმართვისას - ხელმოწერების რაოდენობა ყველა სახის სიაში					
	ხელმოწერების რაოდენობა ახსნა-განმარტებების მიხედვით					
15 სთ	გაცემული ბიულეტენები					
	გაფუჭებული ბიულეტენები					
	კენჭისყრაში მონაწილე ამომრჩეველთა რაოდენობა ვერიფიკაციის აპარატიდან ამობეჭდილი ანგარიშის მიხედვით/აპარატის გარეშე კენჭისყრის წარმართვისას - ხელმოწერების რაოდენობა ყველა სახის სიაში					
	ხელმოწერების რაოდენობა ახსნა-განმარტებების მიხედვით					
17 სთ	გაცემული ბიულეტენები					
	გაფუჭებული ბიულეტენები					
	კენჭისყრაში მონაწილე ამომრჩეველთა რაოდენობა ვერიფიკაციის აპარატიდან ამობეჭდილი ანგარიშის მიხედვით/აპარატის გარეშე კენჭისყრის წარმართვისას - ხელმოწერების რაოდენობა ყველა სახის სიაში					

	ხელმოწერების რაოდენობა ახსნა-განმარტებების მიხედვით						
საბოლოო (20 სთ.)	გაცემული ბიულეტენები						კენჭისყრაში მონაწილე ამომრჩეველთა რაოდენობა
	გაფუჭებული ბიულეტენები						
	კენჭისყრაში მონაწილე ამომრჩეველთა რაოდენობა ვერიფიკაციის აპარატიდან ამობეჭდილი ანგარიშის მიხედვით/აპარატის გარეშე კენჭისყრის წარმართვისას - ხელმოწერების რაოდენობა ყველა სახის სიაში						↓
	ხელმოწერების რაოდენობა ახსნა-განმარტებების მიხედვით						
	გენდერული მონაცემები						

ყურადღება!

გადაამოწმეთ მონაცემთა სისწორე შემდეგი ფორმულის გამოყენებით: რეგისტრატორების მიერ გაცემულ ბიულეტენების რაოდენობას – გაფუჭებული ბიულეტენების რაოდენობა = კენჭისყრაში/არჩევნებში მონაწილე ამომრჩეველთა რაოდენობის.